



Jane en ja klas 3. Omor nikech en e klas manyien. Japuonjgi iluongo ni Mrs. Orina. Jane ohero japuonjgi.

Japuonjni ema osepuonjo Jane chakre nochako skul. Skundno iluongo ni Makutano Primary School. Nyithindo koka ochako higa. Mrs. Orina puonjo gi gik manyien.

Giwinjo gik ma ipuonjogi. Mrs. Orina puonjogi wende manyien. Kendo onyiso gi sigana mang'eny. Ji duto te wuoyo kuom tuo ma onge ng'ama ongeyo kuma ne oae.






Ji duto te e skul wuoyo kuom tuoni. Tuoni iluongo ni *Coronavirus* gi dho Ngere. Jomoko bende luonge ni *Covid-19*. En tuo manyien. Mrs. Orina ne pok onyiso jopuonjrene kuom tuo manyien ni.

Jopuonj duto wuoyo kuom Korona, tuo manyien. Jopuonjre duto e skul mangima bende wuoyo kuom tuoni. Jonyuol bende oluor nikech tuoni.

Giwacho weche Korona e sime. Redio bende lando weche Korona. TV bende nyisowa wach Korona. Ker mar Kenya bende wuoyo mana kuom Korona.





Korona ne en tuo ma ji mang'eny ne ok oyango. Jok moko ne wacho ni ok en adiera. Ne giwacho ni tuo machal kamano onge.

“Korona chal gi homa,” jok moko ne wacho.

“Tuoni chal gi homa mabiro to lal kende. Ok onego waluore,” jok moko bende ne wacho.

Jomoko bende ne paro ni Korona en kuong' moa kuom Nyasaye. Ne giwacho ni onge kaka wanyalo ringe. Ji ne opogore kuom paro.





Chieng' moro achiel, ker ne olando ni tuoni ne osedonjo Kenya. Newachore ni ng'ato achiel ne oyud gi tuoni.

Ji duto ne nigi achiedh nade. Piyopiyo, tuoni ne ochako landore ka mach e bungu. Ji mang'eny ne oyudo Korona. Jomoko bende ne otho kaluwore gi tuoni.

Ne oket chike mang'eny mondo ji olu mondo kik tuoni omedre piyo. Skunde te ne olor. Jane gi joklasgi duto bende ne koro ok dhi e skul.





Korona nyisore e yore mopogore opogore. Jogo mane dend gi nigi liet mokalo kare ne inyiso mondo odhi one ajuoga. Jogo bende mane fuolo ne inyiso ni mondo odhi e od thieth.

Ne nitiere jogo bende mane ok nyal yueyo e yo makare. Ne onego gidhi ir ajuoga.

Jogo bende mane diewo kata onding'gi ne ramo ne onego oyud thieth mapiyopiyo.






Jotelo mochung' ne weche mag ngima e pinywa kae ne puonjo ji weche mang'eny. Achiel kuom gi ne en ni onego ifuol e okumboni.

Bende ne onyis ji ni mondo giti gi otamba ka gigir. Otamba no ne onego oluok maler gi sabun gi pi.

Nonyiswa bende ni kik wamul dhowa, wengewa kata umwa gi lwedo molil. Mago duto ne onego watim mondo walo godo tuo mar Korona.






Ne onyis ji ni onego gilogi sa ka sa gi sabun gi pi mamol. Logo golo kute makelo tuo e dendwa.

Ka ng'ato ne odhi kamoro manyien, ne onego ologi. Nyithindo bende ne nyaka logi.

Ji duto te e miere ne logo sa ka sa. Onge ng'ama ne gombo yudo Korona.






Kuonde ma pi ne onge, ne inyiso ji ni oti gi sanitaiza. Ji mang'eny ne ok ohero kaka sanitaiza ne dung'.

Jogo mane ok dwa tiyo gi sanitaiza, ne chunogi ni nyaka gilogi kapok gidonjo kamoro amora ma itimoe ohala. Weg duka ne neno ni mano otimore.

Weg duka moko ne ok us ne ji mane ok ologo. Ne giluur ni joma ok ologo nyalo miyo jowadgi tuo.







Jotelo mane ochung' ne weche mag ngima ne ochiwo chik. Kuonde duto mane ji mulo ne onego oluoki sa ka sa. Maeri ne miyo tuo mar Korona ok landre mapiyopiyo.

Ne giwacho ni mtokni ma ji tiyo godo kaka matatu ne nyaka luoki. Ne ochiw chik ni matatu nyaka ting' jowuoth matin.

Maeri ne omiyo jowuoth neni thuolo idho mtokni kaka matatu. Mos mos, matatu ne ochako ting'o jowuoth mang'eny kendo.





Tuo mar Korona nomedo landore e Kenya. Ne onyis ji ni nyaka girwak abuog rombe. Ji ne oluoro neno joma orwako abuog rombe.

Ne onyis ji ni nyaka girwak abuog rombe e yo makare maumo nyaka um gi. Kane Korona pok ofweny, ajuoke kende ema ne rwako abuog rombe. Ji te koro ne chalo mana ka ajuoke.

Ji ne ochako loso abuog rombe mek gi giwuon. Ne gindiko gik mopogore opogore. Jomoko ne ndiko niya, “Nyasaye oheri”, “Ahero Kenya” gi mang’eny machalo kamano.






Jotelo mochung' ne weche mag ngima e pinywa kae ne onyiso ji mondo gibed ei udi. Kendo neginyiso ji mondo kik gidhi kama dhano chokore.

Skunde te ne olor. Jotich e ofis bende ne onyisi ni oti e udi. Ne onyis ji ni nyaka gibed mabor mabor gi jowetegi.

Kendo ne ok wanyal mosore gi lwetwa kaka ne wang'iyoyon. Magi duto ne inyisowa mondo kik tuoni olandre ahinya.






Ndalo gi duto skunde ne olor. Jane gi joklasgi moko to ne nigi hawi. Japuonjgi ma Mrs. Orina ne odak e gweng'gi.

Mrs. Orina ne okelo ne jopuonjrene redio moro matin mane giwinjogo puonj. Japuonjgi mar redio ne nie Edu Channel Radio.

Mrs. Orina ne medo lero negi wach mane iwacho e redio. Jopuonjre mane ae skunde mamoko bende nebiro mondo opuonjgi. Ne gihero kaka Mrs. Orina ne puonjo. Jonyuol bende ne mor gi wachni.





Jopuonjre moko ne luwo puonj koa e Edu Channel TV. Ne ipuonjogi gi jopuonj ma opogore opogore.

Jopuonjre mang'eny ne okia sa ma puojruok mar klasgi onego obedie, omiyo ne gineno puonjruok te. Ne gipuonjore gik mathoth.

Seche moko, japuonj mane ni e TV ne penjo jopuonjre penjo. Ne gindiko dwoko e bugegi. Jopuonjre duto ne ohero jopuonj mane puonjo gi e TV.





Ne nitiere jopuonjre mane luwo puonj e sime. Ne giduoko kata penjo bang' puonj ka puonj.

Skunde moko ne oro ne jopuonjre gik mane onego gipuonjre. Kata ka skunde ne olor, buge to noyaw.

Nitiere skunde moko mapod puonjo ka gitiyo gi sime. Jopuonjre ohero puonj ma chal ka magi. Giwacho ni mano ema donjo negi.






Bang' ndalo, rusa mane bor ne orumo. Skunde ne oyaw. Jopuonjre ne osebudho kuom ndalo mathoth kane pok gidhi skul.

Ne gimor ahinya kuom dok e skul. Jopuonj bende ne mor nikech negidok e skul. Gik mang'eny ne olokore. Jopuonjre ne nyaka logi ka gin e skul kendo liet mar dendgi ne nyaka kaw. Jopuonjre bende ne koro bet mabor ng'ato gi wadgi.

“Bende jopuonj biro winja adieri ka aduoko penjo ka arwako abuog rombe?” Jane ne openjore.





Ne nitiere wach maber! Vaksin mar Korona ne oyudore. Jogo mane ochwo kata kane oyudo Korona ne ok hinyre ahinya. Ji mathoth ne odhi mondo ochwogi.

“Bende ibiro tera mondo omiya vaksin mar Korona?” Jane ne openjo min gi.

“Ooyo,” min gi ne odwoke.

“Sani vaksin no pod imiyo jomatiyo e ute thieth, ogul mama, jopuonj gi jodongo,” min gi ne omedo nyise.

Korona pok orumo. Osenego dhano mathoth. Ji pod oluoro tuoni. Jane nigi geno ni skunde ok bilor ma gibudh dala kaka ne gibudho cha!

